

Awe pa 7'or anochi na YMCA Dakota

Fundacion Lisette Gomes ta organisa su prome reunion pa formacion

Esaki pa mantene interes y conscientisacion riba problematica di abuso sexual di mucha



ORANJESTAD - Fundacion Lisette Gomes ta den su momentum y sigur lo sigui pa mantene interes y conscientisacion di e problematica di abuso di mucha cu ta halto den comunidad, y pa hala atencion riba esaki cerca

Gobernantenan.

Un apoyo total ta ricibiendo for di tur persona cu tin e causa aki hopi na curason y ta gradici esaki inmensamente. For di tur caminda tin persona a cuminsa yega serca y duna nan aporte y conseho importante na e Fundashon nobo aki, pa asina logra un diferencia den e sistema, for di locual cu ta hibando te cu awor.

Hopi caminda tin fayonan administrativo, humano y di boluntad pa cu e tema y realidad aki, cual ta abuso sexual di mucha, pero no lo bai pone ningun energia mas riba negativismo, pero lo bai concentra y dedica na coregi, surpasa y mehora tur caminda pa asina duna balor y oido na esun cu berdaderamente ta e unico cu tin cu ser scucha, cu ta e victima inocente di un abuso, cual ta e menornan di edad cu ta pasa den e trauma aki.



Cada dia cu tin un tardansa mas, cu tin un aplaso mas, cu tin cambio di fecha, cu tin scarsedad na personal of cu no tin e boluntad pa cana e caminda cu tin cu cana, ta un dia mas cu un criatura tin cu bai back sin wordo yuda, y peor ainda tin cu bai back caminda cu e abuso sexual ta tumando lugar y di cual e tin cu sigui pasa aden. Un ta tristesa?

Pesey nos kier haci un yamada na personanan den comunidad cu tin un base amplio di e materia aki of estudio, na esnan cu kier duna sugerencia, cu kier pone nan mes disponibel pa yuda, maestronan, polis, trahadornan social y comunidad en general cu kier aporta na : Fundacion Lisette Gomes, pa acepta nan invitacion pa promer meeting di e Fundacion pa formacion di esaki. Fecha pa e meeting aki lo ta awe diahuebs 20 di mei na YMCA Dakota for di 7'or pa 9'or di anochi.

IDEANAN CU A SER PLANTEA NA PARLAMENTO

Ideanan cu a ser plantea na Parlamento caba ta lo siguiente: Un OFENDER'S LIST OFICIAL , caminda tur Pedofil lo ser registra , una bes condena via nos sistema huridico, monitoria despues di ricibi libertad. Lo ser automaticamente poni riba e ofender's List y comunidad lo haya tur informacion di su status : Adres - Potret - Categoria - Castigo - Tipo Di

Abuso Cometi enz. via flyers (y/of media) segun bario caminda cu criminalnan aki lo bai residencia nan mes.

Un WEBSITE OFICIAL pa asina tene e victima, pueblo, scolnan, parke y vesindario informacion na unda tur tin un Pedofil bibando pa asina nan tambe por ta mas cauteloso pa cu menornan di e edad.

Un HULPLIJN 24ORA pa victima of mayor (nan) cu mester asistencia. Tanto emocional, guia y yudansa inmediato, como tambe asistencia policial.

Un SUPPORT GROUP (grupo di apoyo), caminda cu lo duna sosten moral na tanto victima como mayornan pa asina nan por surpasa e trauma biba door di abuso cometi. Esaki lo bai sigur man den man cu profeshonalnan den e ramo aki , como tambe victimanan saliente di un abuso.

Un SHELTER pa asina saca de inmediato e victima for di situacion cu e ta aden, pa asina evita cu e abuso sexual sigui, si acaso esaki ta den e hogar cu e ta encontra su mes aden. Pero tambe aplicabel si e victima su bida ta na peliger na man di un criminal pafor di e hogar cu e ta aden.

Ideanan cu lo mester di bo aporte pa asina concretisa nan. Union lo trece: solushon. Boso precencia lo ta altamente aprecia. Un danki den nomber di cada criatura cu lo ser yuda.